

Evening Dogri (NSD) Bulletin 08-02-2025

आकाशवाणी

खास—खास खबरां

1. बीजेपी नै 27एं ब'रें दे मगरा दिल्ली च वापसी लेई तैआर ऐ। आम आदमी पार्टी गी होर दा मुंह दिखना पेआ।
2. प्रधानमंत्री हुंदा बीजेपी जोरदार सुआगत। दिल्ली चुनां च भारी जित्त दे मगरा प्रधानमंत्री नै पार्टी कार्यकर्ताएं गी संबोधत करा करदे न।
3. केन्द्रीय मंत्री अमित शाह होरें दिल्ली च भारी जित्त लेई सब्बनं वकर्रें गी बधाई दित्ती।
4. अरविंद केजरीवाल होरें दिल्ली चुनाएं दे फैसले गी स्वीकार कीता। उनें बीजेपी गी जित्त पर बधाई दित्ती।
5. सूचना ते प्रसारण मंत्रालय नै नोयडा च एक्स.आर.क्रियटर हैकथान मीट—अप दी मेजबानी कीती।
6. हमास नै इजराइली बंधकें दी रिहाई दे बाद केई फिलीस्तीनी कैदिएं गी रिहा कीता।

<><><><><><>

Round UP Delhi Elections

भारती जनता पार्टी नै तकरीबन त्रै दहाकें परैन्त दिल्ली विधानसभा चुनाएं च जित्त हासल कीती ऐ ते उन्नै दिल्ली दी सत्ता पर पिच्छले 10एं ब'रें थमां काबिज आम आदमी पार्टी गी हराई दित्ता ऐ। कुल 70एं सीटें चा भारती जनता पार्टी नै 47 सीटां जित्ती लैती दिआं न ते उन्नै इक सीट पर बढ़त बनाई दी ऐ ते जदके आम आदमी पार्टी नै कुल 22 सीटां जित्तिआं न। दिल्ली दे असैम्बली चुनाएं च कांग्रेस पार्टी गी इक बी सीट नेई थ्होई ऐ। बीजेपी दी तरफा जेहड़े बड़ड़े मेदवारें जित्त हासल कीती ऐ उंदे च न्यू दिल्ली थमां परवेश सिंह

सिंह, रोहिणी थमां विजेन्द्र गुप्ता, करावल नगर थमां कपिल मिश्रा, जंगपुरा थमां तरविंदर सिंह, रजौरी गार्डन थमां मनजिंदर सिंह सिरसा, गांधी नगर थमां अरविंदर सिंह लवली, ग्रेटर कैलाश थमां शिखा रॉय ते मोती नगर थमां हरीश खुराना शामिल न। उत्थे गै आम आदमी पार्टी दी तरफा जित्त हासल करने आहलें च कालकाजी थमां आतिशी, सदर बजार थमां सोम दत्त, बाबरपुर थमां गोपाल राय, दिल्ली कैट थमां वीरेन्द्र सिंह, कोंडली सीट थमां कुलदीप कुमार, तिलक नगर थमां जरनैल सिंह, बल्लीमारन थमां इमरान हुसैन, तुगलखाबाद थमां साही राम होर मुख न। आम आदमी पार्टी दे संयोजक अरविंद केजली, मनीश सिसौदिया ते सौरभ भारद्वाज अपनी-अपनी सीटें थमां हारी गे न। तोआई उत्तर प्रदेश च मिल्कीपुर विधानसभा हलके थमां बीजेपी दे मेदवार चंद्रभानु पासवाल होरें समाजवादी पार्टी दे अजीत प्रसाद दी 61 जहार 700 वोटें कन्नै हराइयै जित्त हासल कीती ऐ।

<><><><><><>

PM Address

प्रधानमंत्री नरेन्द्र मोदी हुंदा बीजेपी मुख्यालय च जोरें-शोरें कन्नै सुआगत कीता गेआ। दिल्ली चुनां च भारी जित्त दे मगरा ओह पार्टी कार्यकर्ताएं गी संबोधत करा करदे न। प्रधानमंत्री होरें अपने संबोधन च आखेआ जे देसा च तुष्टीकरण नेई सगुआं बीजेपी दे संतुष्टिकरण गी चुनेआ ऐ। उनें आखेआ जे समलूचे मुख्य जानदा ऐ जे जिंदे एनडीए उत्थें सुशासन ते विकास ऐ। लोकें असेंगी त्रीए बारी चुने दा ऐ।

<><><><><><>

PM

प्रधानमंत्री नरेन्द्र मोदी होरें अज्ज दिल्ली विधानसभा चुनाएं च बीजेपी दी बड्डी जित्त हासल करने दरान आखेआ जे जनशक्ति सवोच्च ऐ। सोशल मीडियो पर

इक पोस्ट च प्रधानमंत्री होरें इस गल्लै पर जोर भरेआ ऐ जे उंदी पार्टी शैहरा दे चौतरफा विकास ते एह्दे च रौहने आले दी जिंदगी गी बेहतर बनाने लेई कोई कोर कसर नेइं होग। उनें आखेआ जे विकास ते सुशासन च जित्त हासल होई ऐ। प्रधानमंत्री होरें दिल्ली दे वोटरें दा धन्नबाद करदे होई आखेआ जे उनें बीजेपी गी ऐतिहासक जित्त दित्ती ऐ। उनें आखेआ जे ओह इस गल्लै दी गारंटी दिंदे न जे दिल्ली दा चौतरफा विकास जकीनी बनाने ते लोकें जीवन गी बेहतर बनाने लेई हर मुमकन जतन करगे। प्रधानमंत्री होरें आखेआ जे उनेंगी बीजेपी दे कार्यकर्ताएं पर मान ऐ जिनें इस चाल्ली दे बड्डे जनादेश लेई दिन रात मेहनत कीती।

<><><><><><><><>

Leaders Delhi Polls

केन्द्रीय गृहमंत्री अमित शाह होरें आखेआ ऐ जे दिल्ली दे लोकें एह् दस्सेआ ऐ जे घड़ी घड़ी झूठे वायदे कन्नै जनता गी गुमराह नेईं कीता जाई सकदा। शाह होरें आखेआ जे जनता नै गंदी यमुना, पीने आले गंदे पानी, त्रुट्टी दिए सड़कें, गंदी नालिएं थमां पानी दी वारट निकासी ते हर गली नुक्कड़ च शराब दी दुकान गी लेइयै अपनी प्रतिक्रिया वोट कन्नै दित्ती ऐ। उनें बीजेपी दे सारे वर्करें गी दिल्ली च पार्टी दी बड्डी जित्त पर मुबारकबाद दित्ती। रक्षा मंत्री राजनाथ सिंह होरें आखेआ जे दिल्ली विधानसभा चुनाएं च बीजेपी दी जित्त, प्रधानमंत्री नरेन्द्र मोदी हुंदी अगुवाई ते बीजेपी दी नीतिएं पर भरोसे दी जित्त ऐ। उनें आखेआ जे इस मुख्य दे लोकें गी श्री मोदी हुंदी साख ते सुशासन दे राजनीति उप्पर भरोसा ऐ। बीजेपी दे अध्यक्ष जे.पी.नड्डा होरें आखेआ जे एह् ऐतिहासक जनादेश, दिल्ली लेई सुनेहरे ते मते प्रगतिशील भविक्ख लेई मोदी हुंदे दृष्टिकोण गी लोकें दे बसाह भरोसे च दर्शादा ऐ।

<><><><><><><><>

Delhi BJP

दिल्ली बीजेपी अध्यक्ष विरेन्द्र सचदेवा होरें आखेआ ऐ जे दिल्ली असेंबली चुनाएं च पार्टी दी जित्त, प्रधानमंत्री नरेन्द्र मोदी हुंदे नेतृत्व, विकास ते बसाह् भरोसे दी जित्त ऐ। नमीं दिल्ली च मीडिया कन्नै गल्लबात करदे होई श्री सचदेवा होरें आखेआ जे दिल्ली दे लोकें श्री मोदी हुंदे विकास च अपना भरोसा जाहर कीता ऐ।

<><><><><><>

Kejriwal Result

आम आदमी पार्टी दे राष्ट्रीय संयोजक अरविंद केजरीवाल होरें आखेआ ऐ जे पार्टी नै दिल्ली विधानसभा चुनाएं दे नतीजें गी स्वीकार कीता ऐ ते लोकें आस्सेआ दित्ते गेदे जनादेश दा बी ओह् आदर करदे न। उनें बीजेवी गी बी जित्त दी शुभकामना दित्तियां। केजरीवाल होरें भरोसा जताया जे बीजेपी लोकें दी आसें—मेदे गी पूरा करोग जेह्दे लेई उनेंगी चुनेआ गेआ ऐ।

<><><><><><>

Atishi Kalkaji

आम आदमी पार्टी दियां वरिष्ठ लीडर आतिशी होरें कालकाजी क्षेत्र दे लोकें दा उनेंगी जनादेश देने लेई धन्नबाद कीता। दिल्ली विधानसभा चुनाएं च उंदी जित्त दे मगरा नमीं दिल्ली च मीडिया गी जानकारी दिंदे होई उनें आखेआ जे पार्टी लोकें आस्सेआ दित्ते गेदे जनादेश गी स्वीकार करदी ऐ। उनें पार्टी वर्करें दा बी चुनाएं च प्रचार अभियान लेई उंदा धन्नबाद कीता ऐ।

<><><><><><>

PM Visit

प्रधानमंत्री नरेन्द्र मोदी संगारे थमां फ्रांस ते अमरीका दे इक महत्वै आले दौनें पर खाना होंगन जेहदे च आर्टिफिशल इंटेलीजेंस, रक्षा, बपार ते रणनीतिक सांझेदार उप्पर ध्यान दित्ता जा'रदा ऐ। पेरिस च ओह फ्रांस दे राष्ट्रपति इमैनुअल मैक्रो हुंदे कन्नै एआई एक्शन समुमिट दी सहअध्यक्षता करगंन।

<><><><><><>

I&B Ministry

सूचना ते ते प्रसारण मंत्रालय नै अज्ज नोयडा च एक्स.आर क्रियटर हैकथान दिल्ली मीट-अप दा आयोजन कीता। सूचना ते प्रसारण मंत्रालय नै वेब्स-2025 ते क्रियटर इन इंडिया चैलेंज दे तैहत एहदा आयोजन कीता ऐ। हैकथान च बोलदे होई संयुक्त निदेशालय आशुतोष मोहले होरें आखेआ जे एक्स.आर क्रियटर चैलेंज दी तर्ज पर वेब्स-2025 दे हिस्से दे तौरा पर बक्ख-बक्ख प्रतियोगिताएं दा आयोजन कीता जा'रदा ऐ।

<><><><><><>

Israel

हमास दे त्रऊं इजराइली बंधकें गी रिहा करने मगरा इजराइल नै दर्जनें फिलीस्तीनी कैदिएं गी रिहा करना शुरू करी दित्ता ऐ। जेहड़ा पिछले महीने लागू होइ गेदे गाजा पट्टी च जारी युद्ध विराम समझौते दा ताजा गैई ऐ। एह जारी अंतराश्र्तीय अध्यक्षकें दे दलाली च युद्ध विराम सौदे तैहत इक व्यापक प्रबंध दा हिस्सा ऐ।

<><><><><><>

CM Pre-Budget

जम्मू-कश्मीर दे औंदे बजट गी आकार देने दी इक महत्वपूर्ण गैह दे तैहत मुखमन्त्री ओमर अब्दुल्ला होर बजट कोला पैहले उद्योगें, सैलसफा ते शिक्षा दे खेत्तरें कन्नै जुड़े दे सरबन्धत धड़ें कन्नै सलाह-सुत्तर आहली बैठकां लाऽ करदे न। गल्लबात आहली इ'नें बैठकें दा मकसद महत्वपूर्ण मसलें गी हल करदे होई इस गल्लै गी जकीनी बनाना ऐ जे औंदे बजट च खित्ते दिआं जरूरतां खरी चालली प्रदर्शित कीतीआं जाई सकन। इस मौके पर जेहड़े मुख विशें उपपर गल्लबात कीती गोई उंदे च जम्मू गी इक बड्डी धार्मिक ते सैलसफा आहली थाहरै दे तौरा पर बढ़ावा देने, उद्योगें मतल्लक नीतिएं च सुधार, उद्योगें दा विकास ते खेड्ड ढांचे दे बाददे-विस्तार आहले मामले मुख न। मुखमन्त्री होरें बजट गी बक्ख-बक्ख खेत्तरें दिएं आसें-तांगें मूजब तैयार करने दी जरूरतै पर जोर दित्ता ऐ तांजे खित्ते दा पूरा-पराता ते सामा विकास जकीनी बनाया जाई सकै।

<><><><><><>

CM LAHDC

मुखमन्त्री ओमर अब्दुल्ला होरें जम्मू-कश्मीर च र'वै करदे लद्दाखी लोकें दिएं चैंताएं खासकरियै सेहत, शिक्षा ते जरूरी सेवाएं कन्नै जुड़ी दिएं चैंताए गी हल करने दे मकसद कन्नै अज्ज लद्दाख खुदमुख्तयार फ्हाड़ी विकास काउंसल करगिल दे इक डेलीगेशनै कन्नै उच्ची सतह दी बैठक लाई। उपमुखमन्त्री सुरिंदर चौधरी, मन्त्री जावेद अहमद राणा ते होरनें मुतल्लका सीनियर ऐहलकारें बी इस बैठका च हिस्सा लैता। इस मौके उपपर मुखमन्त्री होरें विद्यार्थिएं लेई उपलब्ध कोटें बारै जागरूकता पैदा करने दी जरूरतै पर जोर पाया ते लद्दाख ते जम्मू-कश्मीर बश्कार तगड़े सरबन्धें बारै अपनी वचनबद्धता गी फही पक्का कीता। डेलीगेशनै, उंदिएं चैंताएं दे नबेड़े लेई सकारात्मक रौंऽ अख्तियार करने लेई मुखमन्त्री हुंदा आभार जताया ऐ।

<><><><><><>

Sakina Itoo Meet

गरीब ते दबोए—लतड़ोए दे समुदायें गी सैह्योग देने दी इक महत्वपूर्ण गैह दे तैहत शिक्षा, सेहत ते उच्च शिक्षा मैहकमें दिएं मंत्री सकीना इत्तू होरें अज्ज दिल्ली च केन्द्री सलाहकार कमेटी दी इक उच्ची—सतह दी बैठका च हिस्सा लैता। बैठक दरान प्रधानमंत्री अनुसूचित जाति अभ्युदय योजना बारै मुख्य करी ध्यान केन्द्रित कीता गेआ ते इस मौके उपपर सेहत सरबंधी योजनाएं, समाज कल्याण सरबंधी पैहलकदमिएं ते शिक्षा सरबंधी सुधारें बारै मुख्य तौर उपपर चर्चा कीती गई। मंत्री सकीना इत्तू होरें गरीब ते दबोए—लतड़ोए दे समुदायें दे कल्याण लेई प्रधानमंत्री अनुसूचित जाति अभ्युदय योजना दे महत्व पर लोऽ पाई ते जम्मू—कश्मीर च इ'नें समुदायें दी तरक्की ते इ'नें'गी उबड़ा चुक्कने लेई सरकार दी वचनबद्धता गी फही पक्का कीता।

<><><><><><>

Rapid Chess

2025 फ्री स्टाइल शतरंज ग्रैंड सलैम प्रतियोगिता कल जर्मनी दे बाल्टिक तट दे वीसेन हॉस च शुरू होई पेदी ऐ। 5में राउंड दे मगरा फैंबियानो कारुआना साढ़े 4 अंक दे कन्नै तालिक च अव्वल थाहरे पर ऐ। जावोखिर सिन्दारोव दूई थाहरे पर ऐ। भारतीय ग्रैंड मास्टर डी.गुकेश सिर्फ 2 अंक दे कन्नै 6मीं थाहरा पर न। अजें 4 राउंड खेड़डे जाने बाकी न। शीर्ष 8 खडारी नॉक आउट लेई क्वालीफाई करगंन।

<><><><><><>